



Na osnovu člana 22 stava 2 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), člana 30 Poslovnika o radu Skupštine Brčko distrikta BiH (Službeni glasnik Brčko distrikta BiH, broj: 54/18 - prečišćeni tekst i brojevi 17/20 i 24/20), člana 16 Zakona o zaštiti prava pripadnika nacionalnih manjina Brčko distrikta Bosne i Hercegovine (Službeni glasnik Brčko distrikta Bosne i Hercegovine, brojevi: 41/20 i 13/21) i Prijedloga odluke Komisije za zaštitu ljudskih prava, Skupština Brčko distrikta BiH, na 14. redovnoj sjednici održanoj 13. oktobra 2021. godine, donosi

ODLUKU

o osnivanju Vijeća nacionalnih manjina Brčko distrikta Bosne i Hercegovine

Član 1 (Predmet)

- (1) Odlukom o osnivanju Vijeća nacionalnih manjina Brčko distrikta Bosne i Hercegovine (u daljnjem tekstu: Odluka) utvrđuju se: sastav Vijeća nacionalnih manjina Brčko distrikta Bosne i Hercegovine (u daljnjem tekstu: Vijeće), kao savjetodavnog tijela Skupštine Brčko distrikta Bosne i Hercegovine (u daljnjem tekstu: Skupština), postupak izbora i imenovanja članova Vijeća, trajanje i prestanak mandata članova Vijeća, nadležnosti Vijeća, organizacija i rad Vijeća te druga pitanja značajna za rad i funkcionisanje Vijeća.
- (2) Svi izrazi korišteni u ovoj odluci, napisani u jednom gramatičkom rodu, odnose se na oba spola ravnopravno i bez diskriminacije.

Član 2 (Definicije)

- (1) Vijeće je savjetodavno tijelo Skupštine koje daje preporuke, mišljenja, savjete i prijedloge o pitanjima koja se odnose na prava pripadnika nacionalnih manjina, a čini ga po jedan predstavnik iz svake nacionalne manjine zastupljene u Brčko distriktu Bosne i Hercegovine (u daljnjem tekstu: Distrikt).
- (2) Nacionalna manjina je dio stanovništva, državljana Bosne i Hercegovine (u daljnjem tekstu BiH), koji imaju prebivalište u Distriktu, a koji ne pripadaju nijednom od tri konstitutivna naroda, a sačinjavaju je ljudi istog ili sličnog etničkog porijekla, iste ili slične tradicije, običaja, vjerovanja, jezika, kulture i duhovnosti i bliske ili srodne historije i drugih obilježja.

Član 3 (Sastav Vijeća)

- (1) U Vijeće nacionalnih manjina imenuju se predstavnici nacionalnih manjina koje su zastupljene u Brčko distriktu, u skladu s definicijom iz člana 2 Zakona o zaštiti prava

pripadnika nacionalnih manjina Brčko distrikta Bosne i Hercegovine (u daljnjem tekstu: Zakon).

Član 4 **(Postupak izbora i imenovanja Vijeća)**

- (1) Skupština, na osnovu odluke Komisije za zaštitu ljudskih prava Skupštine Brčko distrikta (u daljnjem tekstu: Komisija) o pokretanju procedure izbora članova Vijeća, raspisuje javni konkurs za imenovanje članova Vijeća po isteku roka predviđenog stavom 4 ovog člana.
- (2) Javni poziv za izbor članova Vijeća objavljuje se na mrežnoj stranici Skupštine Brčko distrikta i preko sredstava javnog informisanja.
- (3) Za kandidata za članstvo u Vijeću, članove mogu kandidovati već osnovana udruženja nacionalnih manjina i osnivači novih udruženja nacionalnih manjina.
- (4) Proces osnivanja novog udruženja nacionalnih manjina u skladu sa Zakonom o udruženjima i fondacijama osnivač je dužan pokrenuti najdulje u roku od 15 dana od dana stupanja na snagu ove odluke i o istom dostaviti dokaz o pokretanju procesa osnivanja pred organom ovlaštenim za registraciju udruženja i fondacija, uz dokumentaciju po javnom pozivu Komisiji.
- (5) Udruženja iz stava 3 ovog člana koja zastupaju prava pripadnika jedne nacionalne manjine mogu kandidovati jednog, a udruženja koja zastupaju prava pripadnika više nacionalnih manjina, mogu kandidovati broj kandidata do broja nacionalnih manjina čija prava zastupaju.
- (6) Kriteriji za izbor članova Vijeća su opšti i posebni. Opšti kriteriji za članove Vijeća su:
 - a) da su državljani BiH,
 - b) da su stariji od 18 godina,
 - c) da su pripadnici nacionalne manjine – članovi udruženja iz člana 4 stava 3 ove odluke ili da se izjašnjavaju kao pripadnici nacionalne manjine u smislu člana 4 Zakona,
 - d) da su dali izjavu da su predstavnici nacionalne manjine za koju su kandidovani,
 - e) da su dali izjavu o odricanju od prava na članstvo u drugim savjetodavnim tijelima nacionalnih manjina na svim nivoima vlasti u BiH u slučaju da budu izabrani u Vijeće, s obzirom na to da kandidati ne mogu istovremeno biti članovi drugog savjetodavnog tijela nacionalnih manjina na bilo kojem nivou vlasti u BiH i
 - f) da imaju prebivalište na teritoriji Distrikta.

Posebni kriteriji su:

- a) da poznaju pravnu regulativu, u BiH i Distriktu, te međunarodne konvencije u domenu zaštite ljudskih prava i prava nacionalnih manjina,
 - b) da imaju praktično iskustvo u domenu zaštite ljudskih prava i prava nacionalnih manjina i
 - c) da imaju preporuku udruženja iz člana 4 stava 3 ove odluke ili udruženja koja se bave zaštitom i promicanjem prava nacionalne manjine kojoj kandidati pripadaju.
- (7) U slučaju prijave više kandidata iz jedne nacionalne manjine, Komisija je dužna odluku o izboru kandidata pismeno obrazložiti.
 - (8) Članove Vijeća imenuje Skupština.

Član 5 **(Ocjena kriterija)**

- (1) Opšti kriteriji za bodovanje su izlučni.

- (2) Uspješnost kandidata se boduje po posebnim kriterijima.
- (3) Dopunski kriteriji boduju se ocjenama od 1 do 5, gdje 1 označava najmanji, a 5 – najviši stepen ispunjenosti kriterija.
- (4) U slučaju da dva ili više kandidata ostvaruju isti broj bodova po dopunskim kriterijima, prednost ima kandidat koji ispunjava uslove iz člana 2 tačke a) i člana 3 Zakona o mladima Brčko distrikta (Službeni glasnik Brčko distrikta Bosne i Hercegovine, broj 17/18) i člana 20 stava 2 Zakona i ravnopravnosti spolova Bosne i Hercegovine (Službeni glasnik Bosne i Hercegovine, brojevi: 16/03, 102/09 i 32/10).

Član 6 (Mandat Vijeća)

- (1) Mandat članova Vijeća traje četiri godine od dana imenovanja Vijeća.
- (2) U slučaju da mjesto člana Vijeća nacionalne manjine ne bude popunjeno ili ostane upražnjeno, izbor novog člana Vijeća provest će se u skladu sa stavom 2 člana 16 Zakona.

Član 7 (Prestanak mandata)

- (1) Mandat članova Vijeća prestaje:
 - a) istekom perioda na koji su izabrani,
 - b) smrću,
 - c) podnošenjem ostavke,
 - d) prihvatanjem članstva u savjetodavnim tijelima nacionalnih manjina na bilo kojem nivou vlasti u BiH i
 - e) razrješenjem.

Član 8 (Nadležnosti Vijeća)

- (1) Nadležnosti Vijeća, prema članu 17 Zakona su da:
 - a) daje preporuke i mišljenja na programe i projekte koji se odnose na prava pripadnika nacionalnih manjina,
 - b) se izjašnjava na nacрте zakona i drugih propisa koji se odnose na prava pripadnika nacionalnih manjina,
 - c) daje preporuke za rješavanje pitanja koja se odnose na ostvarivanje prava pripadnika nacionalnih manjina,
 - d) priprema i podnosi Vladi i Skupštini periodične izvještaje o statusu prava pripadnika nacionalnih manjina u Distriktu,
 - e) saraduje i koordinira s državnim i entitetskim institucijama koje se odnose na ostvarivanje prava pripadnika nacionalnih manjina,
 - f) organizuje aktivnosti za podizanje svijesti o zaštiti i promicanju prava pripadnika nacionalnih manjina i jača dijalog s udruženjima nacionalnih manjina,
 - g) daje preporuke za finansiranje programa i projekata iz Fonda usmjerenih na zaštitu prava pripadnika nacionalnih manjina,
 - h) prikuplja podatke o identifikaciji pripadnika nacionalnih manjina i
 - i) obavlja i druge poslove iz oblasti zaštite prava pripadnika nacionalnih manjina.

- (2) Vijeće može delegirati stručnjake za rad u Zakonodavnoj komisiji i Komisiji za zaštitu ljudskih prava, kada ona raspravljaju o pitanjima ili aktima od interesa za prava ili položaj nacionalnih manjina u Distriktu.
- (3) Delegirani stručnjaci iz stava 2 ovog člana mogu biti pripadnici nacionalnih manjina ili konstitutivnih naroda.

Član 9 **(Organizacija i rad Vijeća)**

- (1) Organizacija i rad, odnosno način izbora predsjedavajućeg i zamjenika predsjedavajućeg Vijeća, način odlučivanja i sazivanja sjednica, delegiranje stručnjaka u komisije Skupštine i druga pitanja značajna za rad Vijeća uređuju se poslovníkom o radu Vijeća.
- (2) Vijeće donosi poslovník o radu natpolovičnom većinom od ukupnog broja članova, uz prethodno pribavljenu saglasnost Komisije.
- (3) Poslovníkom o radu Vijeća uređuju se, između ostalog, pitanja iz članova 7 i 8 ove odluke.

Član 10 **(Sredstva za rad Vijeća)**

- (1) Sredstva za rad Vijeća osiguravaju se u budžetu Skupštine.
- (2) Troškove rada Vijeća utvrđuje Skupština, na prijedlog Komisije za budžet.
- (3) Stručnu pomoć Vijeću pruža Stručna služba Skupštine.
- (4) Nadležna tijela Distrikta dužna su, na zahtjev Vijeća, pružiti svu pomoć koju traži Vijeće.

Član 11 **(Stupanje na snagu)**

Ova odluka stupa na snagu **osam dana** od dana objave u Službenom glasniku Brčko distrikta Bosne i Hercegovine.

Broj: 01-02-4645/21
Brčko, 13. 10. 2021. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić

Dostavljeno:

1. Predsjedniku
2. Dopredsjedniku
3. Gradonačelniku
4. Komisiji za zaštitu ljudskih prava
5. Komisiji za budžet
6. Stručnoj službi Skupštine
7. Sektoru za opće poslove i strateško planiranje
-Odsjeku za opće poslove
8. Arhivi